

## 太宰府碑

昔郡縣為治 本藩置太宰府與奧鎮守府對峙東西布政牧民且備外寇制甚繁重但以太宰府兼統百濟唐山渤海等聘使文武具官

冊命 親王主帥之非如奧專用武即以權帥大貳來蒞若黃備大江二公其最著稱矣若乃菅公以右大臣左遷權帥羞異數云菅公既以讒至此悒鬱不樂遂薨而葬焉實安樂寺乃天誘其衷京帥亟災

天子動心感悟其非罪追贈旌德祠而祀之寵之四方今太宰府顯矣菅公有詩曰都府樓唯看瓦色說者謂言樓已廢圮惟古瓦供器翫尚未央銅雀比也或謂不然有樓而不登獨望見其薨述幽閨不出門也不則其對曰觀音寺只聽鐘聲何以為說二說未知孰是要之菅公即世業已八百有餘年而太宰府之作未知前菅公幾百閱歲則禦寇所謂如存如亡者誰得而詳之余獨非菅公以太宰府大顯而太宰府為菅公掩人知以詩珍其瓦而不知其詩以瓦傳墾闢其墟泯滅殆盡豈菅公之意乎先儒貝翁篤信作方志至府舊址考索詳甚猶可頤指而箸數然以我心之戚々推翁之紀載詳如彼翁豈獲我心于百年上者非耶何以存舊址垂諸無窮樹石略記顛末且銘之若其地方面名稱等方志盡之不復贅焉即移舊礎三枚布列碑前庶存古也伏惟**當今封建國邑名器非古**以我先侯有大勲勞于慶長間享封 本藩仍

命兵備西南蠻夷奕葉守職而海不揚波奧大國也大小諸侯封疆相接俗又驍蹇何有於毛人蝦夷夫世遷物換天之數也唯能納民軌物置天下盤石上無古今一已於乎盛矣哉銘曰 蕩々大礫 皇雲攸躔 八埏環海 一嶽柱天 孕珠毓金 山媚水鮮 奧鎮東北 巖邑綿延 命筑與肥 控制戎蠻 蠻舶越舲 出沒如煙 賄貨藏禍 重譯通津 鎮臺嚴備 矇矓殷麟 觀時開務 宣稽古賢 都府存蹟 片石屹然 周文服事 商鼎不遷 宇宙自若 帶礪恒新 百王一姓 千億萬年 寬政紀元歲次己酉冬十一月 北筑福岡府甘棠館祭酒龜井魯道載父謹選（刻印二顆）